



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

„კახეთი“

„კახეთი“ (სააქციო საზოგადოება), პოლიგრაფიული მრეწველობის საწარმო, ტარა-შესაფუთი ნაწარმის ინდუსტრიული წარმოების ფუძემდებელი საქართველოში. დაარსდა 1952 თბილისში, როგორც „საქმრეწველგაფორმება“, 1982-იდან ეწოდა საქმრეწველკომბინატი „კახეთი“, ხოლო 1995-იდან ჩამოყალიბდა სააქციო საზ-ბად „კ.“ საბჭ. პერიოდში შედიოდა საქართვე. კვების მრეწველობის სამინისტროს შემადგენლობაში და 85%-ით აკმაყოფილებდა კვების მრეწველობის მოთხოვნას პოლიგრაფიულ პროდუქციაზე. განსაკუთრებით დიდი მოცულობით ამარაგებდა ტარაშესაფუთი ნაწარმით და ეტიკეტებით ისეთ დარგებს, როგორცაა ჩაის, სიგარეტის, საკონდიტრო, მინერალური, უალკოჰოლო და ალკოჰოლური სასმელების, რძის პროდუქტების, საკონსერვო მრეწველობის დარგები.

XX ს. 90-იანი წლებიდან მკვეთრად გაფართოვდა „კ-ს“ სპეციალიზაციის სფერო და მოიცვა ქიმიური, ფარმაცევტული, მსუბუქი მრეწველობის, ელექტროტექნიკური, სოფ. მეურნეობის, საყოფაცხოვრებო დანიშნულების ნაწარმის შეფუთვების მიმართულებაც. განხორციელდა საწარმოს გადაიარაღება, ახ. ტექნიკისა და ტექნოლოგიების დანერგვა. „კ.“ სპეციალიზებულია პოლიგრაფიულად გაფორმებული ტარა-შესაფუთი ნაწარმის, მ. შ. ქაღალდის პოლიმერული ფირის, მოლითონებული ეტიკეტების, სამომხმარებლო მუყაოს კოლოფების, გოფირებული ტარის დამზადებაზე, პოლიგრაფიული სარეკლამო ატრიბუტიკის, მუყაოს საფირმო ჩანთების, ქაღალდის პაკეტების და სხვა ანალოგიური პროდუქციის წარმოებაზე. საჭირო დამხმარე მასალებს (მუყაო, საღებავები, წებო, ქაღალდი, პოლიმერული ფირები და სხვ.) იღებს საზღვარგარეთის ქვეყნებიდან. პროდუქცია (მუყაოს კოლოფები და ლამინირებული გოფრო-ტარა) გადის საექსპორტოდ სომხეთსა და აზერბაიჯანში.

ამჟამად „კ.“ ერთ-ერთი მძლავრი პოლიგრაფიული საწარმოა სამხრ. კავკასიაში. აქ ფუნქციონირებს ოფსეტური ბეჭდვის 13 დანადგარი, მ. შ. ყველაზე ფართოფორმატიანი 4-ფერიანი მანქანები, 4- და 6-ფერიანი ფლექსოგრაფიული საბეჭდი, „ჰაიდელბერგის“ ფირმის ფურცლოვანი ციფრული ბეჭდვის, რულონური ბეჭდვის ციფრული საბეჭდი მანქანები, მუყაოს ფიგურულად კვეთის ექვსი ავტომატი (მ. შ. მსოფლიოში წამყვანი შვეიცარიული ფირმა „ბობსტის“), ლამინირების, ცხელი ფოლგირების, თერმული ბეჭდვის, ეტიკეტების ფიგურული კვეთის შვეიცარიული ფირმა „ბლუმერის“ პროგრამულ-მართვიანი ავტომატები, მუყაოს კვეთის იტალიური ტიგელური წნეხები, გამომკვეთი ტვიფრების დამამზადებელი შვეიცარიული და ფოტოპოლიმერული საბეჭდი ფორმების იაპონური მონოცილინობები და სხვ.

საქართველოში პირველად „კ-ში“ განხორციელდა ოფსეტური ბეჭდვა წინასწარ ფოტომგრძობიარე ოფსეტური საბეჭდი ფორმებით; ასევე პირველად დამზადდა და გამოყენებულ იქნა ფოტოპოლიმერული საბეჭდი ფორმები ფლექსოგრაფიისათვის, ტიპოფსეტური ბეჭდვისთვის, ცხელი ფოლგირებისთვის, ულტრაიისფერი შრობის გალაქვისთვის; განხორციელდა ოფსეტურად ნაბეჭდი ფურცლების „კაშირება“ (ქალაქის გადაკვრა) გოფირებულ მუყაოზე ელიტარული ტარის დასამზადებლად (1982), აგრეთვე ოფსეტური ბეჭდვა მოლითონებულ (1991) და თვითკოპირებად (1993) ქალაქებზე. „კ-მა“ საქართველოში პირველმა დაამზადა მუყაოს ფიგურული კვეთის გამომკვეთი ტვიფრები და გამოიყენა მასში ე. წ. იუსტირების პლასტმასის ღარები, ასევე ჩაანაცვლა ჯანმრთელობისთვის მავნე პოლიგრაფიული პროდუქციის მობრინჯაოების ფხვნილი უვნებელი ოფსეტური ბრინჯაოს პასტით.

საქართველოს ბიზნესრეიტინგების კავშირის მიერ გამოქვეყნებული კვლევის შედეგების მიხედვით 2015 წლის მაჩვენებლებით „კ.“ ნომინირებულ იქნა ვერცხლის რეიტინგით როგორც „წლის ექსპორტიორი“ და ოქროს რეიტინგით – როგორც „წლის იმპორტიორი“.

ნ. რობიტაშვილი
